



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

tiryimiyim@aolima

tir yimiyim

TAPAK 8

Centre-i NE nung ali hectare lakh 2 nung Rubber temtsüogo: Piyush Goyal

Tiananmen lendong bilemtetba nung Hong Kong democracy busemer asem aitsü



VOL. XIX NO. 63 (ADOK 63) DIMAPUR ROGONÜ (FRIDAY) LUCHII (DECEMBER) 10, 2021

₹ 5.00

Nagaland tatar senden Dec 20 nü amentsü

Kohima, Dec 9 (TYO) : Mon district kübok Oting nung sepaitemi tai maketba Naga nung khasetba sülen, Naga Students' Federation-i anir nübertemi state government dang rongdak nungdak tatar senden balaka jazüka Armed Forces Special Power Act, 1958 agientsü atema pangzüng ka azüngtsüla ta akangba ama, tatar senden ka tan December 20, 2021 jazüka iba onük ya jembitsü

telemtetba agiogo.

Iba telemtetba ya tanü Core Committee on Naga Politics Issue senden ka amendang agiogo ta

Planning & Coordination, Land Revenue & Parliamentary Affairs minister, Wb.Neiba Kronui metetdaksü.

Iba kasa senden nung Naga yimten onüka benoka jembitsü ta Kronu-isa ashi.

Oting lendong atema nüburtem dang metetdaksür

Dimapur, Luchii/Dec. 09 (TYO): Mon district kübok Oting nung December 4, 2021 nü nisung tepsetba dak sendakba nung Special Investigation Team (SIT) ajanga nüburtem dang iba lendong dak sendakba nung osang kar danga meteta lira SIT den tongteprateptsü mepishia metetdaksü.

bushisüngdangba nung yaritsü atema imlibilema lemsatepang, ta sangdong ka ajanga ashi.

SP (Crime) aser PRO Nagaland Police, Manoj Kumar IPS ajanga sangdong nung ashiba agi, osangtsüsang ya +91 6009803048 dangi phone call mesüra WhatsApp message ajanga mesüra otingsit@gmail.com dangi email sütettsü.

Osang agütsür indang tejangja miimbanga ayutsü. Ozüng agi melaba ama tapet mera agiba sülen ang chichiba audio/video/ document tem ya bendentsü, ta sangdong ajanga ashi.

COVID-19 Nagaland: Taneptsü angur nisung trok liasü

Kohima, Luchii/Dec. 09 (TYO): Brehostibarnü Nagaland nung COVID-19 tashidak agi menepba nisung tasen kata meliasü, anungji ananü tashi state nung iba tashidak agi menepba alir ya nisung 32,143 dang alitsü.

asür nisung 699 alitsü, aser item rongnung nisung 16 dak danga tashidak liasü, ta pai ashi.

Ajak sentepre COVID-19 agi menepba alir nisung 1,066 danga state temi ogo, ta pai ashi.

Tang tashinung COVID-19 tashidak alitsü temolung melemeti Nagaland nung sample 4,15,513 tendanga lir. Item ya RT-PCR nung 111,633, TrueNat nung 89,084 aser Rapid Antigen nung 2,14,796 tendanga lir, ta Dr Kikon-i ashi.

Brehostibarnü tashinung Nagaland nung nisung 748,416 nem COVID-19 vaccine doses 13,07,449 agütsüogo, ta State Immunization Officer, Dr Ritu Thurr-i metetdaksü.

Nisung 559,003 nem vaccine dose tanabuba agüja parnok iba vaccination course tembangogo. Parnok ya frontline nung inyaker nisung 48,557, healthcare nung inyaker nisung 13,525, arishi küm 45 nungi tema nisung 175,196 aser arishi küm 18 nungi 44 tsüngta nisung 321,755 alitsü, ta Dr Thurr-isa ashi.

Kasa anogo iba tashidak nungi taneptsü angur nisung trok ya Dumapur district nungi pungo aser Tuensang district nungi ka alitsü, ta State Nodal Officer for Integrated Disease Surveillance Project, Dr Nyanthung Kikon-i anogoshi sangdongba COVID-19 bulletin nung ashi.

Tang tashinung iba tashidak nungi taneptsü ngur alir nisung 30,268 alitsü, aser taneptsü anguba rate ya shilem 94.16 alitsü.

Tang active cases nisung 110 lir, aser item rongnung nisung 13 dak iba tashidak agi timtem agütsüba sümia lir, nisung pezü kanga mejungi timtemer aser nisung 93 dak timtem kecha mali, ta pai ashi.

Pezüni buba asü-amaba mali, anungji state nung iba tashidak agi

University of Madras nung asüpila sentong ayongzüka agi

Dimapur, Luchii/December 9 (TYO): University of Madras nung All Tamil Nadu Students' Association, Students' Union, Naga Students' Union Chennai aser NCF Chennai longjemer, Mon district kübok Oting yimtsüng nung December 4 aser 5 nü sepaitemi tepseterem atema December 9 nü University of Madras campus nung asüpila sentong ka ayongzüka agiogo.

agintsü atema akhangtsü mepeshi. Pai ashiba agi, iba ya kang dang ozüng tesashi ka aser taoba mapanga Nagaland kübok tesem balala nung iba ozüng ya aiben mashiyimi amshio.

Maneni sentong nung North East India Welfare Association Chennai tir aser NCF Chennai Pastor Wapangtoshi-i, iba tatalokba aitsüba den asür kinungertem den asükhu lemsatep aser yirur alirtem takaratiba nung taneptsü angutsü imlaja ataba lemsatepa liasü.

Paisa, Tamil Nadu nung aliba nüburtemi Northeast pur teti nongita yariba atema kanga pelaba lemsatepba den iba sentong atema Greater Chennai City Police-i security achaayangtsüba atema mejeta pelaba lemsatep.

Iba sentong nung Chennai kübok tesem balala nung aliba kin balala nungi nüburtem adenshia shilem agi aser kasa tesem nungsa candlelight service ka ayongzüka agia liasü.

Sentong nung All Tamil Nadu Students' Association aser University of Madras Students' Union advisor Sunil-i, asükhu lemsatep aser Tamil nungertemi asür kinungertem aser Nagaland nung aliba nüburtem pusemba lemsatepa liasü. Paisa, Indian Security Forces-i Nagaland nung tai maketba nisungtem tepsetba khu khua aitsü aser Nagaland nungi AFSPA tangsa tang agintsü khanga liasü.

Kasa mapang nung NSUC tir Chibenthung-i, sentepa aliba lokti dang Nagaland nungi AFSPA

NSF-i Kohima nung AFSPA anema longkak ait



Naga Students' Federation (NSF) ajanga December 9, 2021 nü Kohima nung Raj Bhawan jakdang Armed Forces Special Power Act (AFSPA) agienang ta takhangba agüja mener longkak aita liasü.

Kohima, Luchii/Dec. 09 (TYO): North East Students' Organization (NESO) tawabangba kübok Naga Students' Federation (NSF) ajanga Armed Forces Special Power Act (AFSPA) anema Kohima nung Raj Bhawan jakdang Brehostibarnü longkak aita liasü.

Iba sentong nung Eastern Naga Students Federation (ENSF) tir Chingmak Kumchuba Chung-i Mon district kübok Oting nung December 4 nü lendong atalokba indang tatsü agi rasaa ashi, kong civilian aika takum sama. NSF tir Kegwayhum Tep-i tir o jembia aser taoba mapang NSF tir inyaka alisang, Chuba Ozukum-ia jembia liasü.

Kaketshir lenirtemi iba sentong nung jemiba mapang Government of India dang Northeastern region nungi AFSPA agientsü ajungshia liasü.

AFSPA benokba anema mener longkak aita sülen 'AFSPA' nungja agütsür army mesüka monü aser süng agi yangluba (effigies) rongdoka liasü.

Iba sentong nung NSF speaker, James Brilliantson Kashung menden liasü aser Rev. Dr. Benry Lotha, Kohima Lotha Baptist Church ajanga Tsüngrem temoatsü jazüka sarasadem aser Benjong Longchar, secretary, social and culture, NSF ajanga tepela o jembia liasü.

Mon district amokbanger aliba

Konyak Naga kin nung tentet tulutiba, Konyak Union ajanga Oting yimyak civilian 14 tepsetba nung shilem agir Army ajunga jangjateta temerenshi agütsütsü takhangba agüja lir.

Tir Ram Nath Kovind dangi shidi ka züluba nung parnoki aibelena inyakba sepaitem nem temerenshi agütsüba ya ita ka tsüngta nüburtem nem metetdaksütsüla, ta shia lir.

ENPO ajanga par kübok aliba litsü nung azüdokshi malitsü, ta December 18, 2007 nung sangdongba anema security forces temi inyak, ta parnoki tai tongloksür.

ENPO area nungya Naga nung kin trok alir.

Nüburtemi azüdokshiba yimyatam mamshitsüla: CM Rio

Dimapur, Luchii/Dec. 09 (TYO): Oting lendong atema akum agüja In Memoriam nungja agütsü sentong ka December 9, 2021 nü Capital Cultural Hall, Kohima nung agia liasü.

Chief Minister Neiphiu Rio-i iba sentong nung jembiba mapang, Oting lendong ya Arm Forces (Special Power) Act, 1958 meshidaki amshiba lir, ta ashi. Iba Act yameimchir temeden anemba ka lir aser Naga nungertemi mapang talangka nungi anema nokdaka arur, ta ashi.

Rio-i iba lendong nung asür nisung 14 indang kinungertem den asükhu lemsatep. Pai nüburtem dang tasü ita alitsü ajungshia aser mang mayangtsü ayongzüka liasü.

Azü metokshie azüdokshi madak takok angutsü mapang lir anungji nüburtemi azüdokshiba yimyatam mamshitsüla aser linük

dang AFSPA ya menüngdak ta sayutsüla, ta pai ashi.

Meranga inyaker ngutetba yimjung maparen ya kecha tashi nema meraksadaksütsü. Linük aser alimai Naga nungertem otsü angatetba kisüng masü saka teti atema yimjung aginüba metettsü imlar, ta Chief Minister-i ashi.

Iba sentong nung taoba chief minister TR Zeliang-ia AFSPA ya agientsü ashi aser iba yagi timtem aser tejashi ang bener arutsür, ta ashi.

Tai matek civilian tem tepsetba ya kuli kecha agia temeden magütsütet, ta pai ashi aser sorkar dang aibelener nem tapet temerenshi agütsütsü ajungshia liasü.

Naga nungertemi Indo-Naga yimtenren ken o tatem kati arutsü yongya ataba mapang Oting lendong yagi kanga mejungi anakshitsüogo, ta Zeliang-i ashi.

Konyak Union Kohima tir, H Angnyei Konyak-i Oting lendong indang tatsü agi rateta ashi. Paia AFSPA ya agientsüla ta ashi aser linüki Oting lendong ama atalokba majiner, ta shia liasü.

Media nung osang meshidak prokshiba atema pai sasaba ashi aser lokti tentet balalai yaritepba atema pelaba lemsatepa liasü.

Iba sentong nung Kewhira Strings Quartet; Nagaland Conservatory of Music Choir; Sanctuary Choir, Union Baptist Church; Chubatola Imsong; Tali Angh & friends; Konyak Youths (East Story); Bozio Nienu aser Ameü Üsou Zao Choir temi ken tena liasü.

Iba sentong nung Senior Pastor, Kohima Ao Baptist Church, Rev Sentisashi Aier menden liasü aser Deputy Chief Minister, Y Patton-i melepzüng o jembia liasü

Oting lendong nung takum jenbur ana temang tajungba lir: AMCH

Dibrugarh, Luchii/Dec. 09 (Agencies): Mon district kübok Oting nung December 4, 2021 nü lendong atalokba nungi takum jenbur ana Assam Medical College Hospital (AMCH) nung temang anepaluba mapang lir aser tena temang tajungba lir.

AMCH superintendent, Prasanta Dehingia-i osangbener den jembiba mapang, "Tena temang kanga mejungi yirur AMCH bushia bener aru saka tena tangbo temang tajungba lir,"

ta ashi.

"Tenaprong ICU nung lir aser doctor temi mapang shia tena temang repranger. Tena rongnung Jargo Konyak dak operation takok ngua agiogo aser pa tang tajungba lir. Sailong Konyak dak operation tekeraba nung agütsü. Pa haemoglobin level ajema aliba ajanga azü unit asem agütsüogo. Pa indang haemoglobin level timba kumra, pa operation agütsü," ta pai ashi.

"December 5 anepdang 1:00 ako meta tena ya AMCH bushia

bener aru. Jargo dak tenükrem aser tekolak nung injang agi zübu keter liasü. Yangi aliba doctor temi pa dak operation takok ngua agitetogo. Sailong dak teko asr takettsü nung yirura lir," ta Dehingia-i ashi.

Bodhbarnü Congress nungi teshimtet telok kati AMCH nung yirur alirtem ajurua liasü.

Parnok telok ya AICC general secretary Jitendra Singh, Ajoy Kumar, MP Gaurav Gogoi aser Anto Anthony nungertem liasü.

DPRO Dimapur staff tem advent Christmas sentong agi



DPRO Dimapur staff tem December 9 nü Advent Christmas sentong amungba mapang tangokba noksa nung angur.

Dimapur, Luchii/December 9 (TYO): District Public Relations Officer Dimapur aser staff temi December 9 nü Office nung Advent Christmas sentong ka ayongzüka agiogo.

Sentong nung DPRO Dimapur, Lolano Patton-i, taküm küm Christmas nungbo kümtetdakba nem temeim, taitok aser pa tashi angaba sempet agütsütsü sentepa aliba lokti ayongzüka liasü.

Laisa, Covid 19 wara agi kongshi timtem tekangshi tensa balala ajanga Tsüngrem taochi

agi aniba atema maneni Pa nem tenüngsang agütsütsü aser maneni Covid dak sendakba nung inyakyim shidak benoka inyaksangshitsü ayongzü. Patton-i Advent Christmas salem ajak den lemsatsep aser taküm Christmas yabo kanga dang temoatsüba aser teti bilemtstüsa amungba Christmas ka asütsü sarasadema ataba lemsatsep.

Kasa mapang nung UDA, Bendangtoshi-ia, Covid-19 wara ajanga timtem tekangshi tulu nung aliba mapang Tsüngremi masetshi temeim sayuba indang

lemsatsep aser temeim aser tesendaktep tajungba kümogo ta ashi.

Sentong nung Mary aser lar teloki ken tajung ka aten aser Mahalo-i Lai zünga liasü. Nikhili-i Tsüngrem temoatsü meshizüka saradem aser Limala-i tatem saradem agia liasü.

Maneni Zion teloki entertainment sentong balala ayongzüka agiba ajanga sentong tali mera ketdaksü.

Iba sentong ya Advent Christmas benjung chiyong chiyonger tembang.

CKT-i lanur zünger mapa mengui alirtem asoshi shisatokden katsü



CKT Educational Trust-i ayongba educated unemployed youth seminar nung shisalen sayur ana; Dr. M. Chuba Ao aser Dr. Aotoshi den council chairman Wb. Aosanen Pongen aser sentong nung shilem agia adenertem noksa nung angur. Chuchuyimlang, 9th December, 2021

Chuchuyimlang, 09 Dec (TYO): Chuchuyimlang Kaketshir Telongjem Educational Trust-i lanur zünger mapa mengui alirtem asoshi "owning our future" omen dak rangloker Dec 9, 2021 nü Chuchuyimlang yimdak Imlang Salang nung shisatokden sentong tajung ka katsüogo.

Iba sentong nung MARCOFED Ltd. Chairman, Dr. M Chuba Ao aser MARCOFED Ltd. Vice Chairman & Nagaland Gandhi Ashram Chuchuyimlang, Managing Trustee, Dr. Aotoshi na shisalen sayur liasü. Tena kadi "entrepreneurship: Origin, Meaning, Morality and Destiny" aser kadi "entrepreneurship: government/Institution Schemes and Support" onük nung amendaker tensa den apet shisa rajem aika bener arua anganüa agütsü.

Iba sentong nung Chuchuyimlang Village Council Chairman, Wb. Aosanen Pongen-i jembidang, tanü state nung sorkar mapa nung nisung onsara idaktsür sorkar koda masü tensa ka nung aser kümshil lanur tazünger teimba-teimba züina akümer, iba ama tebilemstü ka nung, lanurtemji tepok sünga alitsü asoshi lenmang karbo bushitsü nung dang ajungtsü ta tangatetba yur

iba shisatokden sentong ya ayongogo, ta metetdaksü.

Nagaland nung industry mali aser sorkar tsütsü lenmang kanga temesü, anungji, shinga dak nentaka melii pei sasa mapa apiteta taküm lia aotsü nükla tulu yur iba sentong ya akar, anungji, taoba mapang shisatokden akaba amato mesüi temulung ajak agi angazüker mapa kuma taküm lenmang karbo lapoka otettsü asoshi paisa tadenertem ayongzü.

Yimden/Arogo lungjemer aser yimer bendanglen alirtem teyaritsep nung rongsenketzüng tsütsü jenjang ajungkettsü asoshi mapatong kar inyaksü tebilemba lir, item mapatong ajanga lanurtem nem mapa inyaksü maangka lapoktsü aser ibaji ajanga lenmang aisü nung tajangzüker angutsü imlar, ta Council Chairman Wb. Aosanen aser Chuchuyimlang Baptist Arogo Pastor Rev. T. Lima nati osangbenertem den jembidang lemsatsep.

Shisalen sayur Dr. Aotoshi-i jembidang, business/entrepreneur ka akümtsü asoshi temulung tulu asüba den pa/la dakji - bendanga agütsüba, meranga inyakba, ochishiba, tazüokba, taremsük, tamang katetba, tasen yangerteta otetba, tejangraba aser nükjidong tejangja yur inyakba nübu

asütsü nungdaker, ta ashi. Pungmang kisüng pungmanga kazüba jagi business nung takom mangutsü, ta paisa shisem.

"Ni meinyaktettsü ta masü, ni inyaktettsü aser merangtsü" ta asüba mulungsentsü nungdaker, ta paisa ashi. Business mapa nung temenen mapa inyakra kodanga takom mangutsü, ta paisa tekümdangtsü ka ashi. Paisa Arogo-ia entrepreneur tsütsü temulung agütsütsü asoshi ajungshia liasü.

Bank loan ya kanga kümdanga agitsüla, kechiyong bank nungi kodang senji apudir 'asen taginüba ajak to nüngdakba kümdaktsür, anungji, kechi nükjidong atema senji apur, ibaji mamatoktsüla', ta pai ashi. Business ji teti kasa dangbo malir, khenkhenbo takoksa ajurutsü akok, anungji, koda masüba mapang amshitsü atema sen rizünga ayutsüla aser rongsenketzüng shisatsü dener mapa inyaksü asoshi paisa ajungshia liasü.

Iba sentong nung yimdak zünger mapa mengui alir lanurtem den arogo tenzükerterem, putu yimsüsürtem, VDB züngsem aser Chuchuyimlang VDVK nungi züngsemtem shilem agia aden. Shisalemsatsepba sentong balaka agia liasü.

Mkg. jila nung Covid-19 Special Vaccination Drive akatsü

Dimapur, Luchii/December 9 (TYO): Mokochung Town Ward 18 (terti) nung 12th December 2021 (Deobar) anogo nung tenzüka Covid-19 vaccine agütsütsü.

Iba special Vaccination drive mapang arishi küm 18 nungi temaburtem (18 years & above) shirnoksa Covid-19 Vaccine magi lir parnok pei Ward Community Hall nung arua 1st dose aser 2nd dose agütsü metetdaksüogo.

Kohima DC-i puja bomb mamshitsü tetuyuba agütsü

Dimapur, Luchii/December 9 (TYO): Kohima Deputy Commissioner, Gregory Thejawelie-i sangdong ka ajanga, mozüki, nursing home, primary aser district health care centre, education institution, court tem amala "Silence Zones" temeket meter 100 telongtet nung puja bomb khenyongi amshitsü memelatsü, ta metetdaksüogo.

Kasa sangdong ajangsa, reduced emission (improved crackers) crackers aser green crackers tem dang license bona aliba shishilembartem ajanga ayoktsü aser amshitsü melatsü ta ashi. Puja bomb koba ajanga apokba tesem nungi meter 4 telongtet nung ola 125Db (AI) mesera 145Db (c) Pk adokdaksür iba amala bomb tem

den ola agi minprong agütsür aser jana tali kümdaktsür. Barium salts keta aliba bomb tema tenokdangba agütsüogo.

Puja bomb amshiba Diwali, Gurupurab amala benjung mapang ama aonung 10 ako tashi dang bomb amshitsü melatsü. Christmas eve aser New Year's eve nung bomb ya 12:00 akoshi nungia apok tenzüker anungji item anogotem nung aonung 11:55 nungi anepdang 12:30 ako tashi dang amshitsü melatsü.

DC-isa, Supreme Court tetuyuba dak ajemdaker, puja bomb khenyongi mamshitsü atema tenokdangbabo agüja mali, ajisüka nüburtem dang takok tashi item bomb tem mamshitsü ajungshir, ta ashi.

Item tetuyubatem ya ajaki metsüngareta anidaktsü atema agütsüogo aser tetuyuba sülen manidakertem temzüng ozüng kübok tapet temerenshi agütsütsü, ta kasa sangdong ajanga metetdaksü.

Fellows tem atema sensitization workshop ayongzüka agi



Dimapur, Luchii/December 9 (TYO): Directorate of Employment, Skill Development and Entrepreneurship-i, World Bank- teyari agütsüba Government of India Ministry of Skill Development and Entrepreneurship (MSDE) indang 'Skill Acquisition and Knowledge Awareness for Livelihood Promotion (SANKALP)' project kübok Mahatma Gandhi National Fellowship (MGNF) program nung Fellows tem atema sensitization workshop sentong ka ayongzüka katsüogo.

Administration den sendaktepa inyaksü aser Deputy Commissioners tekolak ser aliba District Skill Committee tem tashi itshidaktsütsü atema yok.

Workshop nung o jembiba mapang , Employment, Skill Development & Entrepreneurship and SSDM, Chiden Yaden-i, iba sentogn ya fellows tem indang tajangshiba angatettsü aser state skilling ecosystem nung stakeholder tem nungi parnok angazükdaktsütsü atema lenmang lapoktsütsü nükjidong nung ayongzüka agi, ta ashi.

MGNF programme ya MSDE-i achaayanger aser State Skill Development Mission (SSDM)-i benoka inyaksangshir. Iba programme indang Academic Partner ji Indian Institute of Management, Kozhikode (IIMK) lir.

Kasa mapang nung IIMK nung CN, Manager, MGNF Sreekanth CN-i, MGNF program kübok stakeholder balala indang shilem, nükjidong aser inyakyimtem metetdaksü.

District jenjang nung effective skill planning aser management atema professional tem maliba ken o bentettsü atema MGNF sentong ya ayongzüker. MGNF kübok research fellows 12, tang Nagaland nung district ajaki yoka lir. Parnok ya District

Iba sentong ya Deputy Director, DESD&E, Zubemo Lotha Tsanglao lenisüba nung agi aser Director, Youth Net Nouné Chase, Founder/CEO, Edu Centre Lezo Putsure aser DESD & E Menguzelie Suohu nungeri presentation agüja liasü.

AASU-i AFSPA agientsü khanga longkak ait



Brehostibarnü All Assam Students' Union (AASU)-i, Guwahati kübok Dighalipukhuri nung AFSPA agintsü khanga longkak aitba mapang tangokba noksa nung angur.

Guwahati, Luchii/December 9 (Agencies): Nagaland nung security forces temi tai maketba civilian 13 tepsetba sülen Northeast nung armed forces special powers act (AFSPA) agientsü takhangba tali kümdar. Brehostibarnü All Assam Students' Union (AASU)-i, Guwahati kübok Dighalipukhuri

nung AFSPA agientsü khanga longkak aitba sentong ka ayongzüka agiogo. AASU chief advisor Samujjal Bhattacharya-i, "Nagaland nung nisung tepsetba ken o nung aibelena alirtem nem tansütsüsa temernshi agütsütsüla," ta ashi. "AFSPA ya Northeast ajunga nungi agientsüla," ta

Bhattacharya-i ashi. Maneni pai centre-i Northeast sentoka toktsüba atema aija liasü. "Centre-i Kolkata adenera India tesem ka lir ta biletettsüla. Ibaji Northeast. Nagaland nung aliba nüburtem amakba ya Assam nung aliba nüburtem amakba den saku," ta AASU-i ashi.

Covid agi asüba osangbenertem PIB list nung maliba ashishi

Guwahati, Luchii/December 9 (Agencies): Covid-19 tashidak agi asüba osangbenertem tenüng, Journalist Welfare Scheme kübok beneficiary tem indang PIB list nung maliba Guwahati Press Club-i ashishiogo. Guwahati Press Club general secretary Sanjoy Ray aser tir Manoj Kr Nath nati iba ken o repringshimtsütsü atema Union Minister of Information and Broadcasting Anurag Singh Thakur dangi shiti ka züluogo. Thakur dangi züluba shiti nung Guwahati Press Club-i, "December 7, 2021 nü Lok

Sabha nung 2021-22 küm atema Journalist Welfare Scheme kübok sen crore 6.5 agizükba metetdaksüba onoki angazükogo." "Linük kübok tesem balala nungi Press Information Bureau (PIB)-i agizükba application dak ajemdaker, COVID-19 tashidak agi asüba osangbenertem kinungertem nem senotsü teyari sen lakh 5 (ajak nem) agütsüogo, koba tenüng asangtsü langa lir." "Ajisüaka tamamangtsüka beneficiary tem rongnung Assam nungi osangbenertembo densema mali aser iba ken o ya PIB-i dang metet, shirnoki iba

list yangluogo," ta shiti nung shia lir. Iba ya Assam nung media fraternity-i magizükter, ta Guwahati nung amenoker aliba media organization-i ashi. Parnokisa, "wara mapang Assam nungi osangbenertem süogo," ta ashi. Union minister dang ken o repringshimtsütsü mepeshia Guwahati Press Club-i, pa dang Assam nungi mesera linük kübok tesem balala nungi osangbenertem iba scheme nungi mezüngtoktsü atema jenjang tapet agitsü mepeshia metetdaksü.

Mizoram nung Covid19 agi ano nisung ka süogo

Aizawl, Luchii/December 9 (Agencies): Mizoram nung taoba ghonda 24 tsüingda ano Covid19 tashidak agi nisung ka süogo aser nisung 320 dak tashidak puteta liasü. Directorate of information and public relations (DIPR), Mizoram-i Brehostibarnü sangdong ka ajanga, sample 3,051 tendangba nungi nisung 320 dak tashidak puteta liasü, ta metetdaksü. Mizoram nung tang positive rate 10.49% nung lir. Tanü tashidak putetertem

rongnung tebur 161 aser tetsür 159 lir. Tashidak putetertem ya RAGT test ajanga nisung 231, RT-PCR test ajanga 38, NAT test ajanga 43 aser FIA test ajanga nisung 8 dak tashidak puteta liasü. Brehostibarnü tashidak putetertem densem Mizoram nung Covid19 tashidak menar 1,37,377 jungogo aser nisung 1,33,819 taneptsü nguogo. Tang Mizoram nung nisung 3,049 Covid tashidak menar temang anepaludar aser iba

tashidak agi ajak senteper nisung 509 süogo. Tang tashidak menar alir 3,049 ya Aizawl district nungi 1605, Lunglei 222, Siaha 46, Champhai 216, Kolasib 79, Serchhip 290, Lawngtlai 127, Mamit 103, Khawzawl 119, Hnahthial 118 aser Saitual district nungi 124 lir. Bodhbarnüa Mizoram nung nisung 273 dak Covid19 tashidak puteta liasü, ajisüaka nisung ka danga masü. Bodhbarnü Mizoram nung Covid19 positivity rate 8.39 liasü.

Centre-i NE nung ali hectare lakh 2 nung Rubber temtsüogo: Piyush Goyal

Agartala, Luchii/December 9 (Agencies): Union Minister Piyush Goyal-i Brehostibarnü ashiba agi, Centre-i küm pongu tsüingda Northeast nung ali hectare lakh 2 nung rubber süngtong temtsüogo. Union Minister for Commerce & Industry, Textiles, Consumer Affairs and Food & Public Distribution-isa, Northeast ya rubber production nung tongtibang tesem ka kümdakr ta ashi. Video conferencing ajanga Brehostibarnü 'Destination Tripura - Investment Summit' nung o jembiba mapang Goyal-i, "Tripura ya linük nung rubber timtiba adokdaksüba state tanabuba lir, kong ali hectare 30,000 nung rubber tsünüa lir," ta ashi. Union Minister-i, state sorkar dang mezüngpur ama maongka agia state nung rubber tsünüba atsülangshitsü ayongzüko, ta Union Ministry of Commerce & Industry sangdong ka ajanga metetdaksü. Tyre Manufacturers Association (ATMA) tawabangba kübok tyre company tetsüti pezü senteper küm pongu tsüingda Northeast kübok state tenet nung ali hectare 200,000 nung rubber tsünütsü atema sen crore 1,000 agütsüogo. Rubber Board aser ATMA na tsüingda 2021 küm March ita 1 nü Memorandum of Understanding (MoU) ka sign süa liasü. Iba inyakyim nung shilem agiba tyre company temi 2021 küm May 20 nü Rubber Board-i larpoker aliba account-i sen crore teranana (12) yoka liasü. Tyre company temi agütsüba sen ya 2021 küm rubber tsünütsü atema planting material balala aliba nung intoka liasü. Northeast nung au tsünüba ya ano resource tongtibang ka ta angateta Goyal-i, Tripura ya bamboo flooring unit tulutiba lir ta ashi. "Tripura dak linük indang Agarbatti Industry hub ka akümtsü tashi lir aser Au nung India Aatmanirbhar kümdaksütsü, koba dang Green Gold, Industry ta ajar," ta Goyal-i ashi. Ato Kilonser Narendra Modi-i North-East India ya Ashth Lakshmi kümdaksütsü jembiba ateshia Union Minister Goyal-i, PM Modi-i 'Focus Northeast' sentong ya kanga

tongtibangsa agir aser 'Make in India' sentong ya 'Make in North-East' sentong ama benoka inyakdar, ta ashi. "Infrastructure tajungba kümdaksütsü aser industry ajungkettsü atema Invest India indang Northeast Desk ka mejeta amenokogo," ta Goyal-i ashi. Goyal-isa, Tripura chief minister Biplab Kumar Deb lenisüba nung Tripura terenlok nung aoba atema tenüngsang agütsü. "State sorkari administration nung 3 'N's; Niyat, Niti & Niyam dak rangloker anibelem mesasai inyakdar. Tripura ya Northeast nung literate state tasembuba lir aser handlooms industry nunga takok tajung anguba state ka lir. Tripura nung südaker lakh 1.36 lir aser Tripura nung adokba polong London tonga benerogo," ta Goyal-i ashi. Pai ashiba agi, Centre-i scheme balala ajanga Northeast nung Agro-textiles & Geotechnical textiles amshitsü ajungshir. "Anüng, ali, rail aser tzü lenmang ajanga tesendaktep tajungba akümba sülen taoba mapang tanga tesem den tesendaktep mejungi aliba ya taoba otsü ka kümogo. State ya tangbo multimodal connectivity nung shilem ka kümogo," ta Goyal-i ashi. Arrtsü adena sen crore 972 intoka Agartala-Akhaura (Bangladesh) rail project ajanga shishilembaba ajungkettsü atema teyari agütsütsü, ta minister-i ashi. "Agartala Airport ya Northeast nung kanga dang mazüngi inyaksangshiba airport tanabuba akümba sülen Tripura ya Northeast atema kikümtong ka akümtsü," ta pai ashi. Tripura sorkari single window portal- SWAAGAT, Capital subsidy (30%), Power subsidy (50%), full reimbursement of State GST aser 4% interest subvention amala inyakyimtem benoka inyakba ya linük nung investment package tem rongnung tajungtiba ka ta Goyal-i ashi. Investment Summit ayongzüka agiba ajanga Tripura-i pei tashi tajungtiba angatetsü ta shia pai, iba conference akaba ajanga state renloka aoba mapang investor tem partner akümtsü atema teyari agütsütsü, ta ashi.

GOVERNMENT OF NAGALAND
DIRECTORATE OF SCHOOL EDUCATION
NAGALAND: KOHIMA

NO.ED/SCH/PMS-3/2019-20 :: Dated, Kohima, the, 8th December, 2021

EXTENSION OF PRE-MATRIC SCHOLARSHIP SCHEME UNDER
MINISTRY OF MINORITY AFFAIRS.

This is to inform that the Ministry has extended the timeline activities for 2021-2022 on National Scholarship Portal (NSP) as under:

SL.NO	ACTIVITIES	DATE
1	Last date for Submission of Online applications by the students.	15thDecember, 2021
2	Last date for L1 verification (Institute Level)	31st December, 2021
3	Last date for L2 verification (DNO, SNO, Ministry Level)	15thJanuary, 2022

Therefore, concerned Institute Nodal Officers (INO's) and District Nodal Officers (DNO's) are informed to adhere to the timeline given in the portal and ensure that students willing to apply for the above mentioned scholarship are facilitated as per the Ministry timeline given.

(SHANAVAS C) IAS
Principal Director

Issued by DIPR

PUBLIC NOTICE

ICICI Bank
ICICI Bank Limited

Registered office: Landmark, Race Course Circle, Vadodra 390 007.
 Corporate office: ICICI Bank Towers, Bandra-Kurla Complex, Mumbai 400 051.

GOLD AUCTION CUK INVITATION NOTICE

Teküboklen shisema aliba sen apurtem dang hon alitsü atema sen apuba sentsüh facility nem agütsütsü atema osang agütsüogo. Parnoki ICICI Bank Limited ("ICICI Bank") nung iba facility agia liasü. Parnoki sentü maotetba ajanga Dec 20, 2021 nü hon osettem auction asütsüsa kümogo. Account agintsü mesera auction agitsüba anogo jelia osang magütsü melenshitsu atema ICICI Bank dak tashi lir. Auction ya online - <https://jewel-auction.procuretiger.com> ajanga 12:30 nungi 3:30 ako tashi agitsü. Osang tejangjaba agitsü atema temalen agüja aliba website-i login süang. Sen apur süatoker lira senmangeri ajak abentsü.

Loan A/C No.	Customer Name
	Branch Name: Dimapur
047605000632	Raju Saha
047605000680	Chuvau Phom

Date : 10.12.2021
 Place : Dimapur

S/d
 Authorised Officer
 For ICICI Bank Limited



TIR YIMYIM YIMOBILEM (EDITORIAL)

DIMAPUR ROGONÜ, LUCHII (DECEMBER) 10, 2021

Kenbang Obang ka asütsüla

Tang Nagaland nung Mon district kübok Oting nung atalokba lendong yagi India sepaitemi tai maketba zü tokshiba anema nokdaktsüsa alima ajak longjemdaktsüogo. Nisung dak temulung malem kisung bilemba agi khaseta yutsütsüsa linük nung ozüng lateta aliba indang ya tangsa tejangjaba aser tesashiba jembir, iba jagi alima tsüngdanga India tejak metenteti kümdagi. Atangji, Armed Forces Special Powers Act, 1958 Northeast nungi aser talisa Nagaland nungi agientsüba ya tang nungi jembir masü saka tamalen nungi iba ozüng agientsüla ta Naga Peoples' Movement for Human Rights (NPMHR) aser Naga Students' Federation (NSF) teloktemi küm 30 jakdang nungi takangba agüja arur aser okadaka ken o benoka lir. Ano, Manipur nungbo tetsür ka tenüng agi Irom Sharmila-ibo iba ozüng tamajung ya Northeast India state-tem ajak nungi agientsüla ta takangba agüja 2000 küm November 5 nü nungi lumitsü tenzükba asenok ajaki meteta lir. Iba anogo nungi tebanglen nungi chiyongtsü kecha meinok, tenilen nungi dang chiyongtsü tanük ludakja küm 16 tashi lumia rarar, 2016 küm August 9 nung la lumiba anen. Lai lasasa la temang yamaji kangshitsüsa timtem agia lumiba kuliji sepaitemi 2000 küm November ita nung Imphal anasa Malom Makha Leikai ta ajaba tesem ka nung AFSPA ajanga agütsüba tashi amshia tai maketba nisung 10 khasetba ngur, tejashi nung iba ama ozüng tamajung ya alima nung malitsüla ta la kija asüyonga tasü itta nokdakba mapa ka liasü. Irom Sharmalai shisabolua bilemba ama, metsütsüi, tanü asenok dak ataloker aser tanüa asenok longjemer iba ozüng ya magientetra asüng ano asenok daksa ataloktsü menua mali. Asenoki aiben asenok dak matalok tashibo asen dangi arutsüba lendong timtemji mereprangtetter, anungji süoki ia mebilemer. Ajisüaka, asenok dak atalokdangbo menuadoker asür. Atangji, temoatsü ajurutsübjaja aser lendong timtem ajurutsübjaja kecha temenu maka, anungji akok tashi asenoki reprangtetba aser rajemba tashi nungbo jelia longjemer inyaksübjaja kanga nüngdaker. Joko, asenoka India sepaitem ket nung tesama, takoksa aser maksü ajurushia ajuruogo aser tang yabo külemi kenbang obang ka ser, kechisüdirsüaka, Nagaland nungi dang masü saka Northeast nungi kecha tai maliba nisung dak temulung malemba kisung agi injang khaloktsütsü aser bomb ajungoktsütsü lateta yutsüba ozüng AFSPA yabo agiendaktsütsüla. Atangji, tang tashibo lokti tentetemi dang masü saka state government-i dena iba ozüng ya agientsüla ta akanger. Iba ya joko asenok kisung ola masü saka alima ajunga ola kümogo. Iba ama mapang nung, asenok Naga nungertem ya kasa onük nung telok tentet shia taginüba aser takangba balala masü saka lokti ajak longjemer tentetba " Joint Action Committee on AFSPA" ka alitsüla. Iba telok jagi dang, Naga nunger ajak tenüng nung jembitsü aser shiba dangi kechi zülutsü nüngdak adokdir, iba Joint Action Committee jagi zülutsü. Iba mapa ya tangsa atemtsüba mapa ka masü, kopiga aotsüar memetet, anungji asenok taginüba matalok tashi asenok telongjem aser asenok mapa mesüdaktsüi maneni ola adoka inyaka aotsü atema, tensa dak apet lokti sentong atonga aotsüsa adoktsü. Iba tangatetba nung, asenokbo yim kati, kin kati mesüra kaketshirtem teloki, lanurtem teloki mesüra tetsürtem teloki ta telok tentet shia balala mesüi, ajakji 'Action Committee' ka nung longjemer külemi inyakra, memetetika asenok kenbang obang medemadoktsü aser iba jagi Naga nunger shi temang nung aser tanüla nung tali tashi taitba akümtsü. Atangji, alima nung ya kecha tebilemtsü mali tepela nung jangratema alidangbo, nisungtem külemi longjema alitsü bilemstübjajibo yutsür, Tsüngrema dena amadoker. Ajisüaka, tang ama timtem lendong atalokba ajangabo nisungtem longjemdaktsür. Kechisarina ajak nung jenjang keta lir, anungji timtem aser takoksa ajurubajaja asenoki Tsüngrem sentong angateta inyakra, iba jenjang langaji asenoki tajunga angutsü

OLEMSABANG

YIMDEN/AROGO OCHI TANÜLA TANGATETBA AGI TENZÜKTSÜLA

~ T.MEYI LONGKÜMER, Windy Ward, Changtongya Town.

Asenok meimcher taküm ka mapang ya nuburi asen nubu sabua aser teyari aginubaji mapang ka dang lir, au karbo sempet tajungji teti junga benshitetsüa akok, saka meimchir ajak kasasa masü ta asenoki angatetdi. Tongtipangsa asen Naga nunger ya telok tentet melirang maparen aisu nung takok ngua bener motet, kechiaser asen Naga nunger dak lokdi meimba shisatsü nisung aika dak lir. Au aji oda meimchersaji karibo paia dangar memetet aser dangeria pa la memetet karbosa alitsü sudi.

Yimten, Arogo maparen mesura telok balala aser kibakiyimtsü yamala maparen aika nung nu sempet, yimya aser tebur ajung den temetetba shisa tajungji sabua Yimten, Arogo aser kejai asüngdangdang yamala mapang tajungji odangbo seyia meyoktsüla kechiaser iba ama mapang tajungji taküm nung aibenbo majurutsüa akok. Tabi agi Yimten, Arogo mesura kijai nu nubu masüngdangtsü, saka nu dak sempet tajung angu nung nu nubu akanger asütsüa akok, saka asenoki ya metetsü tim. Tasüngdangeri asen nubu aser sempet aginua asüngdangaka aseni maparen balala nungi kanga asadanga aser shisadanga agizüktsü tim. Akong tsüka merem ama mebilemdangi agizükba maparen nungi tamakok alitsüa akok.

Tanu joko mapangi bener arur asünung ketdangsuba maparen ashitsü agi Arogo ketdangsuba nung inyaker küm tasazük agi tonger ketdangsuba mapa nung sodi agir aika Arogo balala nung alitsü aser joko tenzükter tasen bushitepa nung nuken bulutsü mapang anasa arur. Tatishitsü agi Arogo nung tenzüktsü bushiba telok kü dangi Arogo Putir asütsü mesura tenzükba kar nung inyaksü asüngdangi aru nung au tereprangtsü aser jembishinu nung kanga tetemsa saka tia maka ni aki nung Arogo Geeneral meeting nung ken danga metendang. Arogo tia aser inyakyim ni memetet Sentepibo teti ta masüyonga aiben aoter saka mebilemdangi khuret pelashishia agizük aser Tanüla mulungba taser sarasademer senshi.

Nangzük nungji joko pungsema metemer den küm suiteama aoter. Kü dangbo junger ta bilema telok sentep ajak nung shidanger saka ashi ama agi nung Arogo tia memetet nung tanem tanemi külem tenzükter den shisa majemtet. Meilungi kümtem suiteama aoter aser nia term agi atong nung sudi angu Arogo tenzükba nung sodi angu nung joko devotional sentep amanger aküm. Ita shia ter shilem list nung nu tenung kendanga mangur, temulungjang agiba Tsüngrem ta nameless nung agatsüa alitsüa akok. Pension angudangbo sen apayurji 10% shilem shidak magatsür. Tsüngremjibo doktsür nisungtemi ajak ya züngdar aser ngudar. Peibo pei itasen agi tenuk masünger aser meperir. Arogo tenzükter sen tutsütsü nungbo pei sen agütsütsü ama ashishir. Ni Govt. Office nung inyaker aser office nung tongtipang Staff asünung, office nung aruba ocet agi sen kümdaktsütsü ni kanga tekera, anungi dokan ajak nung kü office nung aruba ocet agi sunga lir, aser timtumer makamait list nungba ozü tama. Tenla ki sapang nungbo Khristian tajung ama tabensa. Nisungi mangutsüa akok saka Tsüngremibo asen mulungjang tebenja ajak ngudar.

Tenzükba mapa nungi sodi agira limaburi meyiper. Arogo General metting küm nung ken alir ajia nuja mapa tuluba kümdaktsür matener mesura tejak ken sayur oadoker. Tatishitsü agi Arogo nung ketdangsuba aser Putir shimba amala nung ni küm tesazük inyaker sodi agiaka kü taküm tepiyong Putir jenjang nung lir ta angateta alitsü kanga nungdaker. Ibajagi Akong tsüka merema mesui Yimten/Arogo aser Tanüla Temeshi wadang nungbo kanga sarasadema asen taküm peyong kesa jenjang nung litetsü asü melitetsü asadanger langzüktsü tim.

Alima nung shirnoki Tsüngremi mulungba benshir aser inyaker ibaji Kodak, saka shiri temeneni mulungba nung alir aser benshir ibaji Mulumi asütsü sudi. Temalena Mokokchung nung Department tulu ka nung Offcer ka Arogo nung Deacon inyaka alidang Mokokchung District nung Officer tajungtiba adokba asenoki angashiogo. Anungji iba ama tulur ochi shia kütdangsuba den sema asen aoertem Govt, tenzükter ochishia nubur tenzük nung asen Lima terabo temlenshi kati arudisu ta imlar.

Asenok ajak künubo asütsü alinung, funeral service nung danga akümlidang pa ochishir aser teindang asüani ta mangjak nung karidanga ashitsüsa ni/ nai Arogo aser lokti nung ochishia tenzük nung jungdisu ta lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Arogo lenirtemi Khristmas mapang temeim sayutsü ayongzük



Myanmar kübok Mandalay nung aliba Ayeyarwady Covid Centre nung healthworker kati Santa Claus ama sübotsü sübor tanurtem nem sempet lema agütsüba noksa nung angur.

December 09, 2021: Tang rara adoka aliba Myanmar linük nung Khristan lenirtemi Khristanem dang timtemertem dang temeim mapa sayutsü ayongzükogo.

Mandalay, Hakha, Kalay, Pyay, Pathein aser Kengtung nung aliba Arogotem nungi lenirtemisa Khristanem dang pei tamang jenjang renemshia Laishiba azüngtsü ayongzükba den külemi benjungbentsü nung mapang meindoktsü saka tekülem agitsü ayongzük.

Lenirtemisa Arogo lenirtem dang Khristmas aser Küm Tasen tekülem sentongtem nung coronavirus wara anema tetuyuba ajak shidak benshitsu metetdaktüsü.

Hakha Arogo nung tongti

putir, Lucius Hre Kung-i Chin state nung Khristanem dang, tang nisung aika mangyim tia nung lir aser nisung meyrjang aika pei ki toktsür jenshia lir, anungji asenoki Yisu Khrista asoba agizüka nungdabapurtem yaridi, ta ayongzük.

Kalay Arogo nung tongti putir, Felix Lian Khen Thang-ia Sagaing region nung Khristanem dang Khristmas benjung mongpu nung tajung Samaria-i inyakba ama asenokia inyakdi, ta ayongzük.

Myanmar nung sepa yimsüsüba anema tesashiba nokdakba state ji Chin lir. Chin state nung sepaitemi civilian tem amaker aser Tenla kitem densema civilian ki aika raksatsüogo mesüra

rondoktsüogo.

Taküm September 9 nungi tenzüka tang tashi nung Chin state kübok Thantlang jila nung Tenla ki pongu aser ki 450 dak tema rondoktsüogo.

Kayah state nunga sepaitemi Tenla ki pongu amak aser Shan state kübok Pekhön Arogo indang Tenla ki kabo asemben tashi injang aser shells agi raksatsüogo.

Taküm February 1 nü sepaitemi tashiyim amshia democracy lenirtem apuba sülen sepa yimsüsüba tenzüker linük nung yimtenren, loktiliba aser rongsenketsüing jenjang mejungi kümogo.

Myanmar nung sepaitemi nisung 1,300 dak tema tepsetogo aser 9,000 dak tema puogo.

ANO GO ABEN TSÜNGREM DEN

Mulungtet tashi nung agüjang

"Nisung shia Kechi koda pei temulung nung mulungtet aji oda agüjang; saka nunngnanga masü, kangshia masü, kechiaser Tsüngremi pelashishia agütsüba meimer". 2 Korint 9:7

Agütsüba ya tamasa Tsüngremi kotak nung tenzüker, anungji, asenok asoshi teinyaktsü tongtibangbaji, Tsüngrem nem asen taküm, rongsen aser sempet agütsütsüba lir. Merk 12: 41-44 nung amitsür kati tenla agütsüba nungji asenoki tabensaba nung agütsüba tatishitsüji angur. Tangarbo parnok akaba rongsen nungi agütsü. Kechiaser tangarbo parnok jenti akaba rongsen nungi agütsü saka laibo la makaba nungi la akaba ajak mulungsentsü taroktiba nungi agütsü. Amitsürla-i agütsüba ya tabensaba nung agütsü kechiaser: lai mulungsoa agütsü, lai tashi anga agütsü, lai la akaba ajak Tsüngrem nem bendanga agütsü. Asen taküm, sempet aser rongsen jenti mesüaka, Tsüngrem nem temulungtetba shitak agi agütsüra, asenoki tenla agütsüba jagi Tsüngremi mapa tulu inyaktettsü. Martin Lutheri yamai ashi, 'ni kü teka nung oset/langka ayutsüba merang, ajak sama; saka Tsüngrem teka nung kechi agütsü ajak ano kar'.

SARASDEM

Kibuba Yisu, onok taküm rangben agi Ne nem agütsüba tanela lesson sayu nung Ne nem tenüngsang agütsür. Amen

Khristmas mongpu nung Khristan film tasen aika reprangtetsü

December 09, 2021: Khristmas mongpu atongba den külemi nisung aikati pei kibong züngsemtem den külemi mener Khristmas film tasen reprangtsü janjar; yamaji tan Khristmas mongpu nung reprangtsüsa Khristmas aser Khristan film tasen aika sayaogo.

Tawa Khristan film aika sayaogo aser kar theaters nung sayur, kar digital nung, Blur-Ray aser DVD platforms nung angur.

Tan Khristmas mongpu nung kibong züngsemtem den külemi reprangtsü film kar yamai lir.

Documentary film 'Show Me the Father' ya December 7 nü DVD aser Digital nunga sayogo; iba film ya Alex aser Stephen Kendrick nati yangluba mezüngbuba documentary film lir. Laishiba nung tebu tajung ka asütsü atema shia aliba Lai otem nung ajemdaker iba film yanglu.

Iba film nung taoba mapang NFL player Sherman Smith, kaketzülur aser pastor Tony Evans, taoba mapang NFL player Deland McCullough, Focus on the Family Tir Jim Daly aser taoba mapang NFL player Eddie George nung interview agiba densema lir.

'Courageous Legacy' film Digital aser DVD naprongla nung adokogo. Film otsü nung Sheriff indang Deputy Adam Mitchell-i lendong tuluka ajuruba sülen ang pa atema taküm nung kechi tongtibang, ta shisadangtsü tenzüker. Tamangba yimsü nung tesünep



anguba sülen pai tsürabur tajung ka akümtsü telemtetba agir aser pai tangar-a tsürabur tajung kaka akümtsü ajungshir.

'The Girl Who Believes In Miracles' ya tan mongpu nung sayaogo. Iba film nung BMG-Global film stars Academy Award angur, Mira Sorvino den Austyn Johnson, Kevin Sorbo aser Emmy Award angur, Peter Coyote nungeri shilem agia lir. Film otsü nung sayutsüingir kati, tamang agi tenem-a aienshitettsü, ta ashiba sülen Sara Hopkins-i sarasadem tenzüker.

'Christmas with The Chosen: The Messengers' theaters nung sayaogo aser iba film ya Fathom Events indang 'bestselling movie' kümogo. "The Chosen" series nung shilem agirtemi "Christmas with The Chosen: The Messengers," film nunga shilem agia lir. The

Chosen film ticket ayokba nungi dollar sen million 8 yokzükogo. Khristmas omen nung ajemdaker yangluba 'The Chosen' film ya theaters nung December 1-2 nung ang sayatsü sentong liasü saka December 10 tashi saya. Iba film ya Joseph aser Mary na tsütsülen nungi Yisu Khrista asoba indang film lir. Iba film ya "The Chosen" app ajanga reprangtetsü.

Taoba ita 'Journey with Jesus' film sayaogo. Oak Cliff Bible Fellowship nung Pastor, Tony Evans aser par jala ana-Chrystal Evans Hurst aser Priscilla Shirer nungeri Israel lima semdangba indang documentary film ka lir.

Documentary film nung par kibongi Temeshi lima nung Yisu Khrista alima nung aliba mapang nung Pai ministry mapa balala inyakba asadanger.

"Journey with Jesus" film ya Israel nung tangok. Film nung Evans'er kibongi Galilee tzüyim reprangba, Holy Sepulcher Tenla ki semdangba aser pai lokti ka matsüngdang sayutsüingiba densema lir.

'Journey with Jesus' film nung Yisu taküm alidang Pai semdangba tesem balala aser Yisu asoba nungi tenzüka Pa tasü nungi shia aruba tashi nung tatalokba otsütem densema lir. Evans, Hurst aser Shirer nungeri temeshi lima semdangba sülen parnoki ajangshiba nungi asenoki tangazüktsü lesson aika angutsü.

'Respect' film August ita nung sayaogo. Film otsü nung aiür ka tenüng agi, Aretha-i la taküm nung timtem aika ajurua aruba sülen tesüsa la nungtugu kentener ka akümba otsü lir.

Iba film ya Aretha taküm otsü nung ajemdaker yanglu. Lai la

lanuwa Arogo nung ken atentsü ashiba sülen la osangtajung kentener nungtugu ka akümer. Iba film ya osangtajung ken agi tenzüker aser osangtajung ken agisa tembanger.

'The Jesus Music' film October nung sayaogo. Film nung 1960s mapang nungi 1990s tashi aser tanü tashi nung Khristan kenten melenshia aruba documentary densema lir. Iba documentary nung TobyMac, Kirk Franklin, Lauren Daigle, Amy Grant, Bill Gaither, Eddie DeGarmo aser Greg Laurie nung densema osangtajung kentener 12 dak tema interview agiba densema lir.

'American Underdog: The Kurt Warner Story' film December 10 nü sayatsü. Iba film otsü nung tilateri dokan ka nung amener kati Super Bowl nung takok anguba otsü lir. American Underdog film otsü nung Kurt Warner-i University of Northern Iowa nung college football asayaa aru saka NFL team nung pa meshimoker. Iba sülen pa Hy-Vee grocery store ka nung inyakba sülen maongka ngua taküm nung takok angur.

'God's Not Dead: We the People (fall)' film October ita nung sayaogo. Film otsü nung, sorkari home school kibong telok ka reshikangshiba sülen pastor-i item kibongtem pusema jembir. Tesüsa iba ken o angadanga mapang nung Congress matsüngdang kuli agütsütsü atema pastor jaoker.

OLONG PAITEP # 6022

	1				2	3				
4			5							6
						7				
	8									
	9			10				11		
						12				13
14										
						15				
		16								

TIPILEN		LANGTSÜNGLEN	
2. Sü jeplok	- (4)	1. _ _ _ _ i	- (4)
4. O agi merenshi	- (5)	3. Kasa masü	- (6)
7. Ayongküm li	- (5)	5. Nüchi masü	- (5)
8. Chiyungtsü mapang süiadok	- (4)	6. Tashi endok	- (5)
9. Tsüngrem den jembiba	- (9)	9. Langtem	- (5)
12. Saklok	- (4)	10. Anü malidang	- (6)
14. Samaba mebushitet	- (5)	11. _ _ _ _ _ kibur	- (5)
15. Mejanga onü	- (5)	13. Tebur tembar tsungda	- (4)
16. Tzü shiruru ka	- (4)	jatepba	- (4)

OLONG PAITEP # 6021 TELANGZÜBA

TIPILEN :		LANGTSÜNGLEN :	
1. Lemsä, 3. Osang, 5. Mezüng,		1. Lamén, 2. Sangken, 3. Omen,	
6. Agi, 7. Süra, 8. Tebutem,		4. Asüküm, 7. Sendong, 8. Tejang,	
9. Amen, 12. Odi, 13. Asayar,		10. Tanga, 11. Tazü.	
14. Angsü, 15. Agima.			



21ST. CENTURY ALOKBA :



- Tebu** : Kwa talak, nü indang test agiba report sayuangjong.
- Alokba** : Oba ni tanbo subject pungu nungdang tsükogo.
- Tebu** : Taaktsübo, tanü nungi na kü jabaso masütsüa no.
- Alokba** : Common dad, ya class test dangashi DNA test masüato!
- Tebu** : Oh Alokba!!

Lilir : WhatsApp

TANÜBO NAI LANGZÜANG

Q. Koba omen nung ajemdaker 'International Volunteer Day' 2021 amung?
 [A] Volunteer now for our common future
 [B] World needs Volunteers
 [C] Volunteering during Pandemic
 [D] Welcoming Volunteers
 _____ (Taruba adok nung onoki langzüksü)
YASHI ADOK TELANGZÜBA : Delhi-Patna

AO OSHI ANGAZÜKDAK:

TANÜ ANGAZÜKTSÜBA OJANG



Lipüküm
 (n) alima tzü mopong pu küma kümzüka ayuba (Conservation of Environment)
 * Küm shia alima ajunga nung June 5 ya **Lipüküm** anogo amonger.

Lirem
 (n) ali telong nung rema aliba rongsen (natural resources)
 * Asen lima nung akaba **lirem** rongsentem asenoki ano bushia mamshitetter.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

NAI-A YA METETTER MA

1901 küm December 10 nü Stockholm, Sweden nung 'Physics', 'Chemistry', 'Medicine', 'Literature' aser 'Peace' atema mezüng Nobel Prize agütsü. Germany nunger mechanical engineer aser physicist Wilhelm Conrad Röntgen-i X-rays ngutetba atema iba anogo pai Physics nung mezüng Nobel Prize angu



SUDOKU # 6063 TELANGZUBA # 6062

5		7	4	9	8			5	3	9	7	4	8	2	1	6	
6					5	9		8	8	7	2	1	3	6	5	4	9
2				1	6		5		1	6	4	5	9	2	3	7	8
8	5	1	9				4		9	5	3	2	8	7	4	6	1
			6	5	1		9	7	6	4	8	3	1	9	7	2	5
7		9			3			2	7	2	1	6	5	4	8	9	3
	4	5	3		2				3	9	7	4	6	5	1	8	2
	7	2	1			6		5	2	8	5	9	7	1	6	3	4
	8	6			9	1			4	1	6	8	2	3	9	5	7

OJANG LUTEP # 5609

- KÜTAM :
- UNNG :
- TEENSMELHI :
- TSADOKÜ :
- OSASHI :
- ENAS :
- NGDAI :
- SAENYATYA :
- AKBALA :
- MATSRUÜ :

OJANG LUTEP TELANGZÜBA # 5608

BENJONG MAPANG LENDONG TAPU BALALA KANGA BULUR ANUNGJI KANGA KÜMDANGTSÜLA

TAN HOPTA ATEMA - KOMA SÜLA ?

Q. Kisüjensü dang agiba osettem aser asen taküm atema nungdakba chiyongtsü aser osettem ajak asenoki asen nisungtem dang nungi dang alitsüsa, ajungshitepa, lanurtem nem item mapatemji tenzükdaksü nunga koma süla ?

Kibong Kümer Küm 50 Ajungba Mr. V. Imti Lkr & Mrs. Akala Pongen



"Temeimi ajak benteter, ajak amanger, ajak imlar aser ajak aremzüker."
1 Korint 13:7

Nena kibong kümer küm 50 ajungba atema tenüngsang agütsür. Tarutsü nunga Tajungsang Tsüngrem temeim aser temoatsü manung nena maneni arishia lidakjangma.

**Temeim aser Sarasadem den
Chirnurtem, Anük-Apangtem aser Semchirtem**

MULUNGNEN O



**Asür Mrs. Nokensenla Pongen
(12.09.1971 - 04.12.2021)**

Onoki teti meima aliba ojala Mrs Nokensenla Pongen, shiranga aliba mapang nungi tasünü tashi kidang-kiyonger, medemer, yimer-yimtsür aser anük-apang, kwikati rongsen nübu aser tamang sarasadem agi ozü den yaritepogo, nenok ajak dang kangasa pelaba lemsateper.

Tsüngremi nenok mapa tajung aososhi maneni moajangma ta onok sarasadem.
Temeim Kinungbu, Chirnur, Adianutem aser Kinungertem.

Aluyimertemi longkak aitba anentsü telemtetba agiogo



December 09, 2021 nü Singhu arrtsülen SKM-i aluyimertem longkak aitba anentsü, ta sangdongba sülen aluyimertem lenir Yogendra Yadav aser Samyukta Kisan Morcha (SKM) lenirtemi takok anguba temaitsü sayuba noksa nung angur.

New Delhi, Luchii/ December 09 (Agencies): Centre sorkar official shidi ka ajanga aluyimertemi akhangba onük timbaka agizükba metetdaksüba nung ajemdaker aluyimertemi küm ka piyong longkak aita aruba anentsü atema telemtetba agiogo.

Yaküm November ita nungi tenzüka aluyimertemi aluyimba ozüng tasen asem anema longkak aita aruogo. Ajisüaka tawa Ato kilonser, Narendra Modi-i item ozüng asemprongla agientsü sangdongba sülen Parliament nung bill ka benoka item ozüng asemprongla agienogo.

Aluyimertemi takok anguba tenüng nung December 11 nü parnoki takok anguba sentong ka agiba sülen Delhi arrtsülen longkak aitba tesemtem toktsür pei kidangi meyipa aotsü.

Aluyimertemi longkak aitba anentsü lemtetba sangdonga Brihostibarnü Samayukta Kisan Morcha (SKM) lenirtemi, Centre sorkari onok dang nangzükbatem onoki asadangtsü atema sangküm January 15 nü aluyimertem senden ka amentsü, ta metetdaksü.

Aluyimertem lenir, Gurnam Singh Charuni-i, "Onoki longkak aitba anentsü atema telemtetba agiogo. January 15 nü onoki review senden ka ayongzüka

amentsü. Sorkari nangzüka ama meinyakra onoki ano asentenshir longkak aittsü," ta metetdaksü.

Aluyimertemi Delhi-Haryana arrtsülen Singhu nung sükitem bendok tenzüko aser pei kidangi meyipa aotsü renemshidar, ta osang angazüker.

Centre sorkari aluyimertem nem MSP agütsütsü atema committee ka tentetsü nangzüka aser aluyimertem anema benoka aliba ken o ajak

agentsü nangzüka sülen Brihostibarnü aluyimertem unions-i tentetba SKM senden amenba mapang nung parnoki longkak aitba anentsü atema telemtetba agi.

Centre-i aluyimertem dangi züluba shidi nungji agriculture secretary indang sign lir.

Ano külen Uttar Pradesh aser Haryana state sorkartemia longkak aitba mapang asür aluyimertem kibongtem nem senotsü teyari agütsütsü, ta nangzüko.


Lok Sabha nung Home Minister-i yazü jembibi: Adhir Chowdhury

New Delhi, December 09 (Agencies): Brihostibarnü Congress lenir, Adhir Ranjan Chowdhury-i, Nagaland nung tatalokba dak sendakba nung Lok Sabha senden nung union home minister, Amit Shah-i tiyazü jembigo; parnoki ajentsü merangba agi security sepaitemi injang khaloktsü, ta home minister-i ashibaji tiyazü, ta metetdaksü.

Paisa, Congress nungi telok kati Nagaland semdangtsü atema ao, saka Jorhat nung district keddangsertemi parnok nokdang, ta metetdaksü.

Lok Sabha nung Zero Hour mapang nung jembidang Adhir Chowdhury-i, "House telung nung home minister-i yamai metetdaksü, parnok dang anenang ta tuyu saka parnoki ajentsü meranga liasü, ta metetdaksübaji tiyazü," ta ashi.

Chowdhury-isa, Nagaland kübok Mon nung aliba yim semdangtsü aser sepaitemi kasetba ajanga mangyimer kibongtem semdangtsü atema Congress Tir, Sonia Gandhi-i Lok Sabha züngsemtem-



Gaurav Gogoi aser Anto Antony shima liasü, ta metetdaksü.

"Ajisüaka Congress lenirtemi Mon kübok iba yim semdangtsü aliba nokdang. Iba sorkar yagi onoki Lakhimpuri Kheri semdangtsü aliba-a nokdang. Northeast tesem ajaklen tensa tamajungba kümdar," ta paisa ashi.

Hombarnü Lok Sabha nung home minister-i Nagaland nung civilian 14 tepsetba atema mangyim tejashi lemsatepa liasü aser iba ya sepaitemi telungpurtem asütsüa akok ta bilemer aibelena kasetba liasü, ta metetdakja liasü.

Helicopter tsükokba tatalokba bushisüngdang tenzüko: Rajnath Singh



New Delhi, December 09, 2021: Brihostibarnü Lok Sabha senden nung MP temi Bodhbarnü Tamil Nadu kübok Conoor nung tayimtsü lendong nung tsükseta asüsang, Chief of Defence Staff General Bipin Rawat, pa kinungtsü aser tangartem nem akhüm agütsüdang tangokba noksa nung angur.

New Delhi, Luchii/ December 09 (Agencies): Brihostibarnü Defence Minister, Rajnath Singh-i, Chief of Defence Staff, General Bipin Rawat den tangar 12 tsükseta

asüba helicopter tsükokba tatalokba bushisüngdang tenzüko, aser nikongdang tasü mangtemji linük yimtibai bener arutsü, ta metetdaksü. Lok Sabha nung jembidang

Rajnath Singh-i, General Rawat asüpila sentong nungji sepaitemi asür nem tetushi tulu agütsütsü, ta metetdaksü.

Paisa, iba lendong nungi Group Captain Varun Singh bo kümzüko aser tang Tamil Nadu nung aliba Wellington hospital nung yaridar, ta metetdaksü.

Bodhbarnü Tamil Nadu kübok Coonor anasa helicopter tsükokba lendong nung iba tayimtsü nungji mena alir nisung 14 nungi 13 asü.

IAF indang helicopter tsükokba lendong nungji Group Captain, Varun Singh dang kümzü. Tamalen Tejas fighter aircraft ka teyimdak mapang timtem adoka liasü saka Varun Singh-i iba tayimtsüji kanga junga

aziükteta anendaksütetba atema taküm küm tetenzüklen pa nem Shaurya Chakra sempet agüja liasü.

Osang angazükba agi, Brihostibarnü doctor temi, Varun Singh taküm kümzüksü atema taruba ghonda 48 ji kanga tongtibang asütsü ta metetdaksüogo. Singh kümzüka ibaji ajanga helicopter tsükokba kuli karbo jangjatsüa akok ta bilemer.

Varun Singh tebu, Colonel (retd.) KP Singh-a Army Air Defence nung tenzüka liasü aser pa adianu, Lieutenant Commander Tanuj Singh-a Indian Navy nung officer ka lir. Uttar Pradesh nung Congress lenir, Akhilesh Pratap Singh ya tebu adianu lir.

Tiananmen lendong bilemtetba nung Hong Kong democracy busemer asem aitsü

Hong Kong, Luchii/Dec. 09 (Agencies): Tiananmen square nung nisung aika tepsetba bilemteta amungba nung shilem agiba mechi Hong Kong indang democracy movement nung tejangja nisung asem aitsüogo.

2020 kum June 4 nü Hong Kong nung kum shia amungba Tiananmen vigil nung shilem agitsü asoshi dangar ajungmesoba atema media tycoon Jimmy Lai aser activist Chow Hang-tung aitsü aser Gwyneth Ho ya temelaba makai adenshiba nung shilem agiba atema aitsü. Chow ya temelaba makai adenshiba nung shilem agiba atema aija liasü.

Iba obendang ya pei bilemba lemsatepba aser adenshiba temeden anema inyakba mapa kangasa tamajung ka lir, ta temeden asoshi nokdakba telok, Amnesty International ajanga ashi.

Lai, Chow aser Ho nungertemi aibelen masü, ta ashi. Parnok ya tepuokdak lir aser bail agütsüsü memolunger.

"Hong Kong sorkari ano maneni international law nung aibelena China sepaitemi June 4, 1989 nü tepseter nem akum agüja activist tem yimjung nung tetsüngta iter shilem agiba atema aitsüogo," ta Amnesty International indang deputy secretary general Kyle Ward-i sangdong ka nung ashi.

"Kedangsürtemi iba sentong ya ozüing alema ayongzükba lir ta ashir, kechiaser police temi temelaba magütsü, saka yimjung nung nisung adenshitsu atema sorkar nungi temelaba menüngdak. Parnok aitsüba yagi Hong Kong ketdangsürtemi

mera tesashi amshia tejangja activist tem ajemreptsü merangba dang tali sayur."

Hong Kong nung danga political activist tejangja nisungtem ama Lai, Chow aser Ho nunger anema ken o aika benoka lir aser karbo National Security Law kübok takum tepiyong tepuokdak ayutsüsa lir, koba China-i tesüiba kum nüburtemi longkak aitba mechi 2020 kum June ita benokba lir.

Lai shiba tan hopta arishi kum 74 ajung, pai tang shibanger aliba Apple Daily osangkaket amenoka liasü aser ken o mejembidang kum ka jungnüa tepuokdak yua liasü.

Pa ya 2020 kum August ita apu aser tajangzük angutsü mechi bendanger den miima amalitep aka, yimten yimsüsür anema nokdaksüsa ajungmesoba o jembi aser ashikülak mapa inyak ta tai tongloktsü. 2019 kum August ita ozüing alema lokti ana adenshitsu ayongzükba aser yangji shilem agiba mechi 2021 kum April ita pa ita 14 tepuokdak ayutsü obendang agüja liasü.

Kasa ita pai tajangzük angutsü mechi bendanger den miima amalitep aka aser obendangba maparen nung tetsükdaksü agütsüsü tasa yanglu, ta tai tongloktsü. October 1, 2019 nü temelaba makai lokti adenshitsu sentong ayongzükba mechi pa ano 2021 kum May ita nung ita 14 tepuokdak ayutsü obendang agüja liasü.

Chow Hang-tung ya taoba mapang Hong Kong Alliance in Support of Patriotic Democratic Movements of China nung lenir ka liasü, aser parnoki kum 30 tashi annual Tiananmen

candlelight vigil ayongzükba aruba ya kuli ka ama amshia par teloki national security lendongi yoker ta aija iba telok ya shibangtsü.

La anema ken o aika benoka lir, aser item rongnung national security law kübok sorkar tashi samatsüsü ajungmesoba dena lir. Chow-i Facebook nung iba vigil ya amshi aser la indang post nung 'taonung ajuruti' ta zülua liasü.

Gwyneth Ho ya taoba mapang osangbener aliba nungi activist akum aser Legislative Council (Legco) elections atema par candidate shimtsü asoshi sentong ayongzükba mechi national security law kübok kum tenetzüklen opposition politician 47 nem temerenshi agüja alirtem rongnung la ya ka lir. Sorkar tashi samatsüsü atema tasa yangluba ken o nung obendang ataa la ya tepuokdak kum ka jungnüa liasü.

Legco elections ya electoral rule tasenba kübok December 19 nü agitsü renema lir aser linük meimer temi dang shilem agitetsü. Democracy busemba legislator aika danga linük nung jenoka lir.

Beijing yimti tiyong nung kaketshir aser mapa inyakertem adenshia ita aika longkak aita alidak sepaitemi 1989 kum June ita injang khalokja nisung asüba bilemteta Tiananmen Square vigil ya 1990 nungi tenzükba Hong Kong nung aliba Victoria Park nung agia arur.

Iba sentong nung ketdangsürtem dang kechi atalok iba indang ochi temai adokjang aser kechi atalok iba khuret agiang ta akanger. Iba sentong ya coronavirus tashidak wara tenüing amer ketdangsürtemi kum ana nokdanga arur.



Berlin, Germany nung aliba Bellevue Palace nung sentong ka agidang German Chancellor tasenba Olaf Scholz-i pa shimba shidi ka German Tir Frank-Walter Steinmeier-i agütsüba amer tangokba noksa nung angur. World War II sülen Scholz ya Germany indang chancellor teku buba kumogo aser Angela Merkel-i kum 16 yimsü asüba sülen European Union nung nütsüng yongsük timtiba aser rongsenketzüng tulutiba linük nung tendak tasen ka tenzükur.

MULUNGNEN O



Onoki teti meima aliba tsürabur asür **S. Pur Sanglir** (Molungyimsen) pa shirangba anogo nungi tasüba December 4, 2021 tashi nung kija, kibong, Arago, kiyonger, lokti balala aser sosem dangsem shirnokisa rongsen, nübu, sarasadem agi nungita yariogo, nenok ajak dang kangasa pelaba lemsateper. Talubosa moatsüsang Tsüngremi nenok ajak moajangma.

"Kechiaser ni asoshi taküm alibaji khrista, aser tasütsüji tajangzük lir." - Filipi 1:21

~ Temeim Kinungtsü, Chirnur aser Kinungertem.

TEPELA TASOBA ANOGO

10th Dec. 1946 - 10th Dec. 2021



Temeim obala **Mr. B. Olemtiba Pongen Kangtsüng** (Rtd) Teacher, Tsüngremi kum neter pungo (75) tashi anema arishia yutsüba asoshi tenüngsang agütsür. Ozü akümdong asoshi maneni Tsüngremi obala nem arishi aser taküm tajung maneni moajangma.

Temeim Kinungtsü, Chirnur aser Semchirtem

Philippines nung osangbener ka khaset

Calbayog, Luchii/Dec. 09 (Agencies): Pulitzer Prize ngutetba Reuters news agency ajanga Tir Rodrigo Duterte-i temesepba mozü anema raraba bushisüngdangba nung yaritepsang osangbener ka khasetogo. Philippines nung media nung inyaker anema tanen maka azüdokshiba nung takum laluba ibai tesüsaba alitsü.

Philippine National Police headquarters ajanga Brehostibarnü sangdong ka nung ashiba agi, Jesus "Jess" Malabanan ya Samar asetkong nung aliba Calbayog yimti nung par store telung nung television ajia alidang Bodhbar nikongdang tekolak nung akha. Pa ya par ki telung nung lia tepset, ta Calbayog nung aliba police temi ashi.

Mejangjaba nisung anati iba lendong ya agütsü, ta police osang ajanga ashi. Parnok ya tang tashi meputeti lir.

Malabanan ya yimti nung aliba nija mozüki kati anir ao saka arua atongba sülen asü, ta sangdong.

Malabanan metepsetdang National Union of Journalists in the Philippines (NUJP) ajanga data bendenba nung 2016 kum June ita Duterte tir akumba sülen linük nung osangbener tajemba agi 21 tepsetogo, ta sayur.

October ita online journalist aser radio commentator Orlando Dinoy ya southern Davao region nung par ki telung nung tepset. Pa tepset ta temolung melema alisang ya pua nisung tepsetba ken o nung aitsü, saka Dinoy tepsetba ya pa mapa den sendaktepba ka masü, ta sorkar indang osangbener kati ashi.

Central Panay asetkong nung aliba Capiz province nung osangbener nungi yimten yimsüsür akumer ka May ita tepseta liasü.

New York nung amenoka aliba Committee to Protect Journalists ajanga 1992 nungi tenzükba aliba tesem ajunga nung data benden tenzükba sülen tang tashinung osangbener mapa inyakba mapang nisung 87 tepsetogo, ta Bodhbarnü lendong matalokdang shia liasü.

CPJ ajanga October ita tatemlen data ka sayaba nung alima nung osangbener tepsetba ken o timtiba metembangteti aliba linüktem rongnung Philippines ya jenjang tenet buba nung liasü.

Tang tesüsa Malabanan tepsetba densema linük nung osangbener 14 tepsetba ken o tatem kati maruteti lir.

Osangbener tepseter tekeratiba nung jangjateta aputsü asoshi tajungtiba inyaker, ta Philippine National Police Chief General Dionardo Carlos-i sangdong ka nung shia liasü.

Wokha DC-i tetuyuba agütsü

Dimapur, Luchii/December 9 (TYO): Wokha Deputy Commissioner, Orenthung Lotha-i official sangdong ka ajanga, Wokha District kübok NH-61 (New NH-02) nung KM 72.4 nungi KM 74.4 tashi PWD (NH) department nem Right of Way (RoW) temelaba agütsüba metetdaksüogo. Paisa, National Highway ya mapang atakzuka yur inyaksangshir aser atakzükja

aliba mapang tsüingda nung lenmang tembanga yanglutsü aser nüngdak makaba nung mapa mesüzükdaksütsüla, ta ashi. Nüburtem ajak ajangzüktsü mechi Wokha District kübok NH-61 (New NH-02) nung KM 72.2 aser KM 74.4 tsüingda kiojen balala sür aliba tem osang agütsüba sülen anogo 30 tsüingda agütsü asoshi kiojen kiburtem nem metetadksüogo.

LEARN FROM PROFESSIONALS

Beauty, Hair, Makeup, Knitting, Crochet,
Flower Making & Jewellery Making
Contact No. : # 9717288352 ; # 9971581223



Nikos Hospital & Research Centre
Midland Dimapur-797112 Reg. No. NHCE/DMR/30/LIC/2012
Phone: 03862-248285/232032 Email: hospitalnikos@gmail.com

AVAILABLE NEUROPSYCHIATRIST

For Consultation

Dr. Ayangla Longchar, MBBS, DPM

Central Institute of Psychiatry, Ranchi

Monday to Friday 9 AM to 4 PM

Saturday 9 AM to 1 PM

For registration, call 03862-232032 / 248285

AOLI OZÜKÜM MUNG DANG HON JUBILEE ASER LOKTI SENDEN SENTONG

Anogo : December 13 - 14, 2021

Tesentepdak : N.E.R Agri Expo, 4th Mile, Dimapur



Omen : Tsüingruksütonga Atsüingakang

KETDANGPURTEM

Tir : Wb. Zülutemjen Ozüküm (Waromung)
Tadong Tir : Wb. Watisütsüing Ozüküm (Mopungchuket)
Tongti Zülur : Wb. Meyizülü Ozüküm (Mongsenyimti)
Repsem Zülur : Wb. Aowati Ozüküm (Süingratsü)
Sen Zülur : Wb. Tiatemsü Ozüküm (Mongsenyimti)
Kimen : Wb. Masachuba Ozüküm (Mongsenyimti)

MEZÜNG SENDEN SENTONG

Anogo : December 13, 2021

Mapang : 3:00 PM

Mungdang Lapokba

Dimapur Aoli Ozüküm Telungjem

Menden : **Ketdangpurtem**
Moajangma : **Rev. Dr. Temjen, Pastor**
Indisen Baptist Arogo
Menden Okila : **Tir, Aoli Ozüküm Mungdang**
Lanlia : **Wb. T. Alinüngsang Ozüküm, Tir**
Dimapur Aoli Ozüküm Telungjem
Tejak Shiotep : **Tadong Tir**
Aoli Ozüküm Mungdang
Meshii Melitet : **Dr. S.I. Tushi Ozüküm**
Director (Retd)
Medical Services, Nagaland
Ozüküm Jubilee : **Sb. Likümer Ozüküm**
Yabo Shinür : **Wb. Bendangkokba, IAS (Retd.)**
Sobaliba Ken : **Waromung Ozüküm**
Tzümasen Tekürüh: **Wb. T. Marlemba Ozüküm**
Public Prosecutor, Dimapur
Osangtem Agitsü : **i) Tongti Zülur Osang**
ii) Sen Zülur Osang
Tebilemba Benokba :
O Lemtep Mapang :

JUBILEE YATI SENTONG

Anogo : December 14, 2021

Mapang : 9:00 AM

Tetushi Tejaoker : **Wb. T. Tongpang Ozüküm**

Hon'ble Minister, PWD

(Housing & Mechanical),

Govt. of Nagaland

O Jembir : **Wb. M. Akang Ozüküm**
Sentong Lenir : **Wb. Marshitet Ozüküm**
Asür Bilemtetba : **Rev. Dr. Lima Ozüküm**
Aoli Ozüküm Naklo : **Wb. Salangtoshi Ozüküm & Wb. Wabongtoshi Ozüküm**

Dave Bautista-i 'Knock at the Cabin' nung shilem agitsü

Luchii/December 09, 2021 (Agencies): M Night Shyamalan indang taruba film 'Knock at the Cabin' nung Hollywood star Dave Bautista-i shilem agitsü. Universal Pictures indang film ya February 3, 2023 nung sayatsü.

Sangdong ajanga angazükba agi, Shyamalan-i iba film otsü zülutsü aser direct asütsü. Shyamalan meyong Blinding Edge Pictures kübok Ashwin Rajan den longjemer iba film produce asütsü.

Iba film otsü dak sendakba nung osang tejangja magütsü.

Shyamalan aser Ashwin dak alaka, Marc Bienstock aser Steven Schneider nati 'Knock at the Cabin' produce asütsü aser iba project ajanga Universal aser Shyamalan tsüingda tesendaktep maneni tejakleni aoba sayur.

Taoba film pezü nung Universal-i Shyamalan den külemi inyakogo. Item project pezü ya 'Old' (2021), 'Glass' (2019), 'Split' (2017) aser 'The Visit' (2015) asütsü.

'Old' film ya taküm September ita India nung sayaogo. Iba film nung Gael Garcia Bernal, Rufus

Sewell, Thomasin McKenzie, Vicky Krieps aser Ken Leung nungeri tongti shilem agir.

Shyamalan aser Universal indang tesüsa sayaba film ajanga global box office nung million dollar 90 aazükogo.

Maneni, taoba mapang Wrestler, Bautista-i blockbuster movie 'Dune' nung shilem agiba nguogo.

Tawa, Bautista-isa 'Knives Out 2' production maparen tembangogo aser tang pai 'Guardians of the Galaxy Vol. 3' tangokdar.

Pooja Bhatt-i 'Hero to Animals' Award angu

Mumbai, Luchii/December 09, 2021 (Agencies): International Animal Rights Day anogomung nung, PETA India-i film yanglur aser actress Pooja Bhatt nem 'Hero to Animals' Award agütsü.

Film yanglur Mahesh Bhatt aser Lorraine Bright na jala Pooja, shiba dang Kiran Bhatt ta ajar, lai ashiba agi, "Kü nem iba Award agütsüba atema PETA dang kanga pelar. Tangari kü dak temeim sayuba aser aria bilemba ama shiruru danga meimtsü aser

aneplautsü sayuba atema kütsü (mother) dang pelar."

Mumbai nung kor ajanga osettsüset abenba maparen nokdangtsü atema Pooja-i PETA India indang campaign nungitta yariogo. Iba den külemi Jaipur anasa nisungi kanga dang mejungi züker aliba shidi (Malti) chioktsü atema lai jembii; aser social media sabang nung 'manja' (kite) ajanga ozütem yirutsütsü mesüra südaktsütsü akok ta tekümdangtsü osang sangoktsü.

Pooja-i o jembiba kisting masü saka mapa agi lai inyaka sayur. Yimdong nung senzüba shirurutem lai mesür aser la aliba tesem nung lai tanü (cat) anepalur.

"Shirurutem kümzüktsü asoshi Pooja Bhatt-i bendanga agüja inyaker," ta PETA India Director of Celebrity and Public Relations, Sachin Bangera-i ashi.

'Hero to Animals' Award atema Pooja-i Trophy ka den 'letter of appreciation' angu.

Taoba nung, lockdown mapang shirurutem mesütsü senotsü agütsüba atema Odisha Chief Minister Naveen Patnaik-i iba award nguogo. Ano, meimchir aser shiruru taküm kümzüktsü asoshi 'manja' inyakyim ajak nokdangtsü shilem tulu agiba atema, Delhi Environment Minister Imran Hussain-ia iba award angu.

'Hero to Animals' Award angur rongnung kentener Zubeen Garg (Assam nung shiruru tenlaba nokdangtsü asoshi inyak), Gaurav Gera, Rohit Gujjar, Shilpa Shetty, Zareen Khan, Cyrus Broacha, Rani Mukerji, Asin aser Imran Khan nunger dena lir.

Longleng nung 'walk against violence' sentong agi

Dimapur, Luchii/Dec. 9 (TYO): Activism against Gender based Violence dak sendakba nung anogo 16 sentong balala ayongzuka agiba nung shilem ka ama December 7 nü Longleng jila nung walk against violence sentong ka ayongzuka agiogo. Iba sentong ya District Administration, Mahila Shakti Kendra - District Level Centre for Women aser Phomla Hoichem nunger longjemer ayongzuka liasü.

Sentong nung o jembiba mapang Phomla Hoichem tir Chuimei Phom-i, lokti nung tetsürtem anema inyaksangshiba anema asenoki nokdakba aser asenok tashi sayutsü atema sabang tajung agütsütsü asoshi tarutsü nunga iba amala sentong ya ayongzuka agitsü sentepa aliba lokti ayongzük.

Kasa mapang nung Women Pastor, Longleng Town Baptist Church, Niamla Phom-i iba sentong indang tatsü agi rasaa shia liasü. Iba sentong ya Lempong nung tenzük aser Aboi junction nung tembang. Arogo balala nungi tetsürtem, kiyong balala tirtem, lokti balala nungi lanur lenirtem aser SDO civil, Longleng-i anir district administration-i iba sentong nung shilem agia liasü.

Ni ya shinür : **i) Wb. I. Nangshi Longchar**
Tir, Aoli Mongsen Mungdang
ii) Wb. Sopolu Jamir, Advocate

Tsüingrem Dang Sentsüwangshi : **Wb. S. Lanu Ozüküm**
Pastor Purana Bazar 'B' ABA

Tsüingruksütonga Atsüingakang : **Sb. Tamsümongba Ozüküm & Kr. Chubatila Ozüküm**

Kümrem Pelar : **Wb. Chubazulu Ozüküm**
Ayongzükur : **Wb. Maongkaba Ozüküm, Advocate**

Konang Tetushi & Nüngo kaket sayaba
Elangtsür Ken : **Dimapur Aoli Ozükümsür**
Tetushi Tejaoker O :
Yimli Ken : **Mopungchuket Ozüküm**

Onük : Tsüingruksütonga Atsüingakang

MUNG DANG SHIBANG SENTONG

Anogo : December 14, 2021 **Mapang** 3:00 PM

Menden : Ketdangpurtem
Onok Moajang : **Wb. Imtisünep I. Ozüküm**
Asso, Pastor (Youth)
Aoyim Baptist Arogo
Ajungshi O : **Wb. L. Moa Ozüküm**
Temeja Ken : **Wt. Süpongmelema Ozüküm**
Osangtem Agitsü : **i) Nüngtet Luden**
ii) Bangzüng Luden
Züingkümschidi : **Wb. Imtilepzük Ozüküm**
Deputy Director,
Dept. of Agriculture, Nagaland
Kimak Ken : **Yimjenkimong Ozüküm**
Aenküp : **i) Wb. K. Imtiwati Ozüküm**
Convenor, Local Planning Committee
ii) Wb. S. Wati Ozüküm
Convenor, AOM Planning Committee

Menden Atsüingtepba
Tetoktsür Menden O : **Wb. Zülutemjen Ozüküm**
Tir, Aoli Ozüküm Mungdang

Mungdang Shibang
Sarasadem : **Telok**

TEMETETTSÜ

- Iba sentong nung adentsü Dimapur Aoli Ozüküm Telungjem (DAOT)-i Oboula semchir aser Anükapang ajak pelashishia jaoker.
- Tarurtem asoshi Apokatsü aser Tanendak DAOT-i agütsütsü.
- Jubilee Sentong nung Züluyur: Sb. T. Senti Ozüküm & Kr. Bendangjungla Ozüküm.
- Elangtsür Ken. l/c Wt. Limanaro Ozüküm & Wt. Nangshizungla Ozüküm
- Mapang Amshiyim
a) Tongti O jembir - minutes 25
b) Tanüingba ajak - minute 10
- Mungdang mapang Timsür mapa Dimapur Aoli Ozüküm Telungjemi inyaktsü.
- Mungdang tatem anong Sangpangtu alitsü. Iba sentong Dimapur Aoli Ozüküm Telungjemi achaayangtsü.
- Mungdang asoshi tebilemba (Agenda) kar lira, December 10, 2021 tashi nung ketdangpur ket tongjang.
- Aoli ozüküm züngsen saru magütsürtemi Mungdang mapang bener arutsü mepishir.
- Sentong takok asoshi ajaki sarasadema atadi.

Champions League: Bayern Munich-i Barcelona tsükdaksü

Luchii/December 09, 2021 (Agencies): Champions League asayamung group stage nung, Manchester United aser Switzerland indang club Young Boys na draw (goal 1-1) nung tembang. Küm 17 tashi iba League indang season shia knockout round tonga asaya arur sülen, taküm group stage nung Barcelona tsükogo. Bayern Munich-i 3-0 agi Barcelona tsükdaksü. Kasa mapang, rürjeb kanga tsükba ajanga, Group F nung Atalanta aser Villarreal asaya anogo atsülangja liasü.

Saint Petersburg nung, Chelsea aser Zenit Saint Petersburg na asaya tatemlen Zenit nungi Magomed Ozdoev-i goal ka idaktsüba ajanga Chelsea aser Zenit na draw (3-3) nung tembang. Juventus-ia Champions League group phase asaya tatemba kokogo. Group H nung Juventus-i Malmo FF madak 1-0 agi takok angu aser iba group nung takoker team ka ama last 16 atema Juventus pur qualify süogo.

Bodhbarnü, Bayern Munich-i Barcelona madak 3-0 agi

takok anguba sülen, Champions League nungi Barcelona tsükogo. 2000-01 season nungi group stage nung takok ngua asaya arur külen, tan season group stage nung Barcelona team mezüing tamakok angur asütsü.

Iba asaya mezüing half nung, Thomas Mueller (34) aser Leroy Sane (43) nati goal ka ka idaktsü. Group E nung temaba jenjang tongtetsü atema group stage nung German Club - Bayern-i asaya ajak (6) takok nguogo. Break sülen, tanabuba half nung Bayern atema Jamal Musiala-i minute 62buba nung goal tasembuba bendenloktsü.

Kasa League, Group F nung Man United aser Young Boys asaya liasü. Iba asaya nung United atema Greenwood-i goal ka aser Young atema Rieder-i goal ka inoktsü. Draw nung tembangaka, iba group nung Man United-i temaba jenjang parnok qualify süogo. Ajisüaka, iba group punlanglen alir Young Boys pur League nungi tukuogo.

Group H nung Chelsea aser Zenit na draw - goal 3-3 nung tembang sülen, group nung

Chelsea-i temaba jenjang metongtet. Bodhbarnü, St Petersburg nung telok ana tsüingda asaya tenzükli minute 2buba nung Timo Werner-i mezüing goal idaktsü. Mezüing half atongtsü lia Claudinho (38) aser Azmoun nati (41) Zenit atema goal ka ka inokja liasü.

Break sülen, Chelsea-ia telangzüba tajung agüja Lukaku-i minute 62buba nung team atema goal tanabuba idaktsü aser iba asaya atemtsü minute 5 lia Werner-isa goal tasembuba bendenlokja liasü. Mapang talila apuloktsür (90+4) asayaba mapang Ozdoev-i Zenit atema goal tasembuba inoktsü.

Iba asaya draw nung tembangba ajanga, taoba Champions League takok angur Chelsea pur Group H nung runners-up ama tembang.

Chelsea pur asaya trok nungi point 13 nguogo, koba point 2 agi temaba jenjang nung alir Juventus tesülen lir. Juventus-i Sweden indang Malmo FF madak goal 1-0 agi takok anguba sülen Group H nung parnoki temaba jenjang ajangzüket.

Boxing National Camp: Mary Komo Amit Panghal nati shilem magitsü



New Delhi, Luchii/December 09, 2021 (Agencies): Anogo 13 tashi ayonga agitsü aliba National Camp nung trokben world champion MC Mary Kom aser Asian Games gold medal angur Amit Panghal na den tanga boxer kari shilem magitsü. Ajisüaka, Tokyo Olympics bronze medal angur Lovlina Borgohain iba Camp nung adentsü.

Ano, Manish Kaushik, Ashish Chaudhary, Vikas Krishan aser Satish Kumar densema Tokyo Olympics nung shilem agir tebur boxer pungo tashi tebur 52 indang list nung maden.

December 11 nungi 24, 2021 tashi Patiala indang National Institute of Sports (NIS) nung iba training camp agitsü.

Taküm Olympics nung shilem agir tebur pungo rongnung Vikas ya tapubang surgery agidar.

Tebur Camp ama kasa anogo nungi Rohtak kübok Sports Authority of India (SAI) Centre nung tetsür Camp

tenzüksü. "National championships nung shilem magiba ajanga iba Camp nung parnok mezüingok. Iba Camp ya national medal angurtem aser Nationals tatemlen trial ka sülen shimer atema dang alitsü ta jelia lemtet," ta otongdar sangdong ka ajanga metetdaksü.

"Iba Camp nung madenertemi kanga shisabulua mebilemtsüla. Tang, iba Camp nung tenüing malirtem taruba Camp nung adentsü asoshi maongka angutsü," ta kasa sangdong nung shia lir.

Iba Camp dak sendakba nung Mary Kom dang asüingdanga liasü, saka lai iba Camp indang kecha mejembi.

"Kidang ni training agidar. Sangküm January tom nung külem team den training agitsü aser World Championshipa atema renemtsü," ta lai ashi.

Manipur tsür arishi küm 38 tain Mary, shibai taobo Olympics nung bronze medal angu, lai Rajya Sabha MP ka ama inyakdar. Sangküm, Mary-i world championships aser

Birmingham nung Commonwealth Games nung asayatsü tebilemba lir.

Covid-19 tensa süngjema maoba asadangteta International Boxing Association (AIBA) ajanga Istanbul nung asayatsü aliba tetsür World Championships ya December melen sangküm March tashi atsülangja liasü.

Iba national women's camp nung tanga rongnung Tokyo Olympics bronze-medal angur Lovlina Borgohain (70kg), taoba mapang junior world champion Nikhat Zareen (52kg) aser Asian champion Pooja Rani (81kg) nung densema boxer 49 agi shilem agitsü.

Borgohain-i Nationals nung shilem magi, saka Tokyo nung lai medal anguba yong iba Camp nung la shilem agidaktsütsü asoshi federation-i lemtet.

"Iba list ya taoba sanen luden senden nung lemtetba ama lir, kong tanga boxer dak alaka Lovlina list nung züingok," ta kasa sangdong nung shia lir.

Tebur Camp nung boxer rongnung, pungoben Asian medal angur Shiva Thapa (63.5kg), Asian silver-medal Deepak Kumar (51kg) aser taoba mapang world championship quarter-finalist Kavinder Bisht (57kg) nung dena lir.

National Camp anaprongla (tebur aser tetsür) ya head coach tasen akhüm nung achayanga agitsü. Tebur Camp ya Narendra Rana aser tetsür camp ya Bhaskar Bhatt nati anir agitsü.

2buba Dr. Imkongliba Ao Memorial Trophy atsülanger

Dimapur, Luchii/December 09, 2021 (TYO): 2buba Dr. Imkongliba Ao Memorial Open Volleyball Trophy, koba December 7 nungi December 9, 2021 tashi asayatsü renemer liasü, iba asayamung ya taoba mapang sangdongba ama masü saka December 13 nungi December 15, 2021

tashi asayatsü. Iba Volleyball asayamung ya DDSC stadium Dimapur nung ayongzüksü.

Iba asayamung dak sendakba nung osang tejangja agitsü atema ph.no. 70052 80962/60092 31946 nung tongtepratepang, ta sangdong ka ajanga metetdaksü.

Mauresmo-i French Open director inyaktsü



Paris, Luchii/December 09, 2021 (Agencies): Taoba mapang women's World no. 1 Amelie Mauresmo ya French Open indang director ama osang sangdonga liasü aser Guy Forget melen lai French Open director inyaktsü.

2024 küm tashi Mauresmo-i iba mapa inyaktsü, ta French tennis federation president Gilles Moretton-i ashi.

Anaben Grand Slam takok

angur (2006 küm Australian Open aser Wimbledon) aser 2004 küm Athens Olympic nung singles silver medal angur Mauresmo-i la nem Roland Garros indang director mapa inyaktsü maongka agütsüba asoshi pelaba lemsatsep.

Iba claycourt asayamung - Roland Garros ya kanga dang nungtugu lir aser Federation sen arutsü asoshi iba asayamung kanga dang tongtibang.

Asian Masters Marathon taruba küm India nung asayatsü

Luchii/December 09, 2021

(Agencies):

Masters

Athletic

Federation of

India (MAFI)-

i taruba küm,

mezüingbuba

Asian Masters

Marathon ayongzüka

asayatsü sentong lir.

Arishi küm 35 tema aliba

asayatem Asia linük 40 dak

tema nung adenshia full

marathon (42.195 km), half

marathon (21.097 km) aser

10km race nung shilem agitsü

imlar, ta kasa sangdong ajanga

metetdaksü.

Iba asempetba asayamung

ya 2022 küm tatemba nung

asayatsü aser technical

standards tematiba dak

ajemdaker ayongzüka asayatsü,

ta MAFI-i ashi.



Asian Masters

Athletics (AMA)

Secretary S

Sivapragasam-

i, "2021 küm

October ita

AMA Council

senden ka

a m e n b a

mapang, Masters

Athletic Federation of

India-i benokba ajaki

mulunga agizük aser yamaji

Asian Masters Marathon

ayongzüka asayatsü atema

agizüka MAFI nem temelaba

agütsüogo," ta ashi.

"India nung ayongzüka

asayatsü aliba Asian Masters

Marathon atema AMA kanga

yongyaa atar aser Masters

Athletics Federation of India

bendanga nongita yaritsü aser

technical tsütsü tenüingdakba

teyari ajak agütsütsü," ta paisa

ashi.

BILEMDANGANG

"Nükjidong makai aoba telok nung rongrong teti alitsü."